



Na osnovu čl. 61. stav 2. i 99. stav 3. Zakona o upravi ("Službeni glasnik BiH", br. 32/02 i 102/09), direktor Agencije za državnu službu, donosi

INSTRUKCIJU
ZA PROVOĐENJE PRAVILA ZA KONSULTACIJE U IZRADI PRAVNIH PROPISA
U AGENCIJI ZA DRŽAVNU SLUŽBU BOSNE I HERCEGOVINE

DIO PRVI – UVODNE NAPOMENE

1. Ovom instrukcijom utvrđuju se bliža pravila i uputstva za konsultacije u izradi pravnih propisa u Agenciji za državnu službu Bosne i Hercegovine (u daljem tekstu: Agencija), kako bi se Pravila za konsultacije u izradi pravnih propisa ("Službeni glasnik BiH", broj 5/17) – (u daljem tekstu: Pravila), efikasnije provela i bolje razumjela.

2. S obzirom na nadležnosti Agencije koja se ne pojavljuje kao obrađivač zakona, osim izuzetno kada je Vijeće ministara Bosne i Hercegovine (daljem tekstu: Vijeće ministara), za to zaduži zaključkom, svrha donošenja ove instrukcije je upoznavanje zainteresirane javnosti sa određenim propisom koji je u fazi izrade, razumijevanje stvarnog učinka normativno - pravnih aktivnosti, prvenstveno u pogledu donošenja podzakonskih i drugih provedbenih akata čiji obrađivač ili donosilac je Agencija, koordinacija i razumijevanje među partnerskim institucijama, efikasnost i efektivnost Agencije u ovom domenu, s posebnim akcentom na transparentnost, učinkovitost i procjenu s različitih aspekata uticaja propisa koji se izrađuje

3. Svi pojmovi koji se koriste u ovoj instrukciji odgovaraju po definiciji pojmovima iz člana 2. Pravila.

DIO DRUGI – PROVOĐENJE KONSULTACIJA

4. Agencija je obavezna da, u skladu sa članom 7. Pravila, sprovede minimalne konsultacije za svaki propis koji je u fazi nacрта ili prednacrt, što znači da se isti postavlja na web aplikaciju eKonsultacije, te da se uz poziv za dostavljanje prijedloga i primjedbi postavlja i izjava o svrsi propisa i, ukoliko je vršena sveobuhvatna procjena učinka za taj propis, izvještaj o provedenoj procjeni propisa, uz minimalan rok za davanje prijedloga i primjedbi od 15 dana od dana kada je prednacrt ili nacrt propisa postavljen na web aplikaciju eKonsultacije.

5. Agencija je u obavezi da prilikom izrade godišnjeg plana izrade propisa utvrdi da li neki propis koji je u planu ima značajan uticaj na javnost, odnosno kakav je nivo uticaja tog propisa, te da u slučaju velikog uticaja prilikom izrade tog propisa obavi i dodatne konsultacije kako je to propisano u čl. 16. do 18. Pravila.

6. U skladu sa članom 3. Pravila Agencija na svojoj internet stranici vodi i ažurira popis pravnih i fizičkih osoba zainteresiranih za njene normativne aktivnosti, a koje se registiraju na web aplikaciji eKonsultacije.

7. Agencija može, u skladu sa članom 27. Pravila sklopiti sporazum o saradnji sa udruženjima i drugim pravnim osobama koje su zainteresirane za njene normativne aktivnosti, u cilju unapređenja normativnog okvira i prakse konsultacija sa zainteresiranom javnošću.

8. Posebnom odlukom direktor Agencije imenuje koordinatora i zamjenika koordinatora za konsultacije, koji godišnji plan izrade propisa i drugih akata objavljuju na internet stranici i web aplikaciji eKonsultacije, te su odgovorni za ispunjavanje svih obaveza Agencije u provedbi konsultacija propisanih Pravilima.

DIO TREĆI – KORIŠTENJE KOMENTARA I IZVJEŠTAJ

9. Zaprimiti prijedlozi i primjedbe dobijeni u roku za konsultacije Agencija razmatra s tim da neke prihvata u cjelosti, neke djelomično ili ih pak odbija, ali je u izvještaju o provedenim konsultacijama obavezna dati sumarno obrazloženje relevantnih prijedloga i primjedbi koje su prihvaćene ili odbačene. Izvještaj je sastavni dio obrazloženja koji Agencija dostavlja Vijeću ministara u prilogu predloženog pravnog propisa, uz obrazloženu izjavu da su ispunjene minimalne obaveze u pogledu konsultacija i izjavu da li nacrt pravnog propisa ima značajnog uticaja na javnost ili ne.

10. Obrasci za primjenu Pravila sastavni su dio web aplikacije eKonsultacije, na koju se svaka zainteresirana osoba može registrirati i prijaviti.

DIO ČETVRTI – IZUZIMANJE

11. Izuzetak od minimalnih konsultacija postoji samo u slučajevima propisanim članom 8. Pravila.

12. U izuzetnim okolnostima, a kako je propisano članom 24. Pravila, direktor Agencije može Vijeću ministara dostaviti prijedlog za oslobađanje od obaveze konsultacija.

DIO PETI – PRELAZNE I ZAVRŠNE ODREDBE

13. Stupanjem na snagu ove instrukcije prestaje da važi Instrukcija broj: 01-02-2-893/11 od 05.11.2011. godine.

14. Ova instrukcija stupa na snagu danom donošenja.

Broj: 01-02-2-862/17

Sarajevo, 15.09.2017. godine

DIREKTOR

Neven Akšamija